

■ CONVIVENZA

Sur sviadas – ina carta fitg speziala

DA BETTINA CADOTSCH*

Cura avais vus tramess la davosa giada ina carta postala ad insatgi? Forsa essas vus sco jau. Jau chat cartas simplamain insatge bel – uschè bel ch’jau tramet adina in pèr salids da las vacanzas ad insatgi. Forsa – e quai è bain era probabel – èsi gia in mumentin che vus avais bittà la davosa giada ina carta postala en ina stgaffa da brevs. Ozendi na vegnan numnadamain betg pli tramessas tantas sco pli baud. Tuttina è la carta anc adina la novitad analoga la pli populara – er en il mund digital.

Mai personalmain fascinavan las cartas gia da pitschna. Jau chattava fitg interessant ch’ins pudeva trametter insatge dad ina vart dal mund fin a l’altra vart – e che quai arrivava era per propi! Jau chattava cool da survegnir da mia sora salids da la Nova Zelanda u da l’America dal sid. Savens ma dumandav jau quantas personas che hajan gì enta maun questa novitad fin ch’ella era finalmain arrivada en nossa stgaffa da brevs. Jau hai adina rimnà tut las cartas en ina gronda stgatla – ed jau las rimnel anc oz.

Jau sun en general in uman che stima cartas e



brevs. Surtut perquai ch’ins las scriva a maun. Jau sun da l’opiniun che cartas – saja quai per trametter salids da las vacanzas, per gratular, per engraziar u era per condolar – commovian simplamain pli fitg ils umans che texts digital. L’impressiun è tut outra, perquai ch’ins dovra dapli engaschi che per scriver in pèr lingias via WhatsApp. Ins studegia ditg e lung tge ch’ins less scriver, sa prenda la peda e tscherna er anc in motiv. En pli èsi da tschertgar l’adressa e lura da trametter la carta u la brev per posta. In process pli lung – però er in process che fa en mes eglis plaschair pli grond.

In tal plaschair ma vuleva far questa stad er in’amia. Ella m’ha tramess ina carta da la Frantscha. Arrivada n’è ella però betg. La collega aveva nudà in’adressa cumpletta

fallada, uschia ch’jau hai pensà ch’ella saja svanida. Mia carta è però arrivada tar ina dunna a Favugn cun in num sumegliant. Il legher: Questa dunna m’ha alura tschertgà e contactà per Facebook e ditg ch’ella haja probalamain survegnì insatge per mai. Dus dis pli tard hai jau gì la carta en mia stgaffa da brevs.

Jau hai gì enorm plaschair. Per l’ina che questa carta n’è betg simplamain svanida, per l’altra che mia idea da l’uffanza n’è betg ruinada. Cartas arrivon – tuttina da nua. En pli hai jau chattà fitg bel da questa dunna ch’ella ha gì la buna veglia da tschertgar e contactar mai. Quai na sa chapescha betg da sasez cunquai ch’i n’era betg ina brev impurtanta sco in quint, mabain simplamain in salid da las vacanzas. Tenor mai è quai in bel exempel per mussar ch’i dat chaussas ch’arrivan puspè en il dretg lieu, ch’ins po er adina avair in zichel speranza e ch’i dat gliedud che fa da quests bels gests. La carta da l’amia ha tras quai survegnì ina nota speziala. Ed engiavinai ina giada tgi che ha survegnì sco engraziament ina carta da mai?

*** Bettina Cadotsch è creschida si a Savognin. Ella studegia Multimedia Production a la Scuola auta spezialisada dal Grischun a Cuir e lavurata tar Radio Südostschweiz e «suedostschweiz.ch»**